

* 116. *Conostethus salinus* n. sp.

Elongatus, flavescenti- vel virescenti-albidus, abdominis dorso nigro; rostro apice fusco; pronoti lateribus obsolete sinuatis; hemielytris albidis, intus obsolete infuscatis, membrana pallide fusca, unicolori; nervis albidis; tibiis parce nigro-spinulosis, tarsis apice infuscatis, unguiculis magnis. Long. ♂ ♀ 3,5 mm.

Mas: angustior, pedibus longioribus, tibiis anticis valde excurvatis; antennis crassioribus, nigris; vertice, prothoracis disco scutelloque postice fumatis, his linea media albida; hemielytris intus abdominisque lateribus obsolete infuscatis.

Femina: crassior, pedibus brevioribus, tibiis anticis obsolete curvatis; antennis mediocribus, albido flavis, articulis apicalibus infuscatis; capite, pronoto, scutello ventrequae concoloribus.

C. roseo Fall. (*C. aridello* Flor.) affinis, sed paullo major, coloreque distinctus. — *Caput* breve, globoso-convexum, nitidum laeve, virescenti-albidum, unicolor (♀), vel plaga transversali inter oculos tyloque basi fuscis (♂); genis postice tenuiter albido-pubescentibus. Rostrum abdominis basin attingens, virescenti-albidum, apice nigro, articulo basali crassissimo. Oculi parvi, globosi, nigri. — *Antennae* ad marginem inferiorem, oculorum insertae, obsolete pubescentes, vel robustae, nigrae (♂), vel mediocres pallide flavescens, apicem versus infuscatae (♀); articulo primo, incrassato, brevi; secundo hoc dupplo longiori et angustiori; tertio secundo parum longiori, apice curvato, in mare intus longius albido-pubescenti; quarto tertio dimidio breviori. — *Pronotum* latitudine plus dupplo brevius, lateribus sinuatis, angulis basalibus prominentibus, margine basali ad humeros rotundato, medio obsolete emarginato; disco subdepresso, laevi, ante medium utrinque callo magno, convexo, transversim ovali, linea impressa bene determinato; virescenti-albidum, unicolore (♀); vel fumatum, vitta media, longitudinale, pallida (♂). — *Scutellum* triangulare, laeve, ante medium linea transversali, recta, fundo nigricante, profunde impressa; totum albidum (♀); vel disco postico, linea media longitudinali